

RM260.14 juta bantu rakyat tangani Covid-19

SelangorKini.my

13 Julai 2020

by Afeeqa Afeera

SHAH ALAM, 13 JULAI: Sebanyak RM260.14 juta dibelanja bagi pelaksanaan dua Pakej Rangsangan Ekonomi Selangor Prihatin yang memanfaatkan 3.5 juta rakyat di negeri ini.

Dato' Menteri Besar berkata bagi fasa pertama, bantuan kewangan diberi terus kepada rakyat dan petugas hadapan pada peringkat awal Perintah Kawalan Pergerakan.

"Fasa kedua pula usaha tambahan menangani isu sosial dan ekonomi seperti Pasar Agro Selangor, e-dapur dan Selangor Advance untuk mengadaptasi norma baharu kehidupan," kata Dato' Seri Amirudin Shari ketika membentangkan pakej rangsangan ekonomi fasa ketiga di Dewan Negeri Selangor hari ini.

Beliau berkata pakej ketiga bertindak sebagai daya tahan untuk Selangor membangunkan semula ekonomi setelah mengalami kejutan mendadak susulan pandemik Covid-19.

Amirudin berkata pelan pemulihan ekonomi itu menekankan tiga tonggak utama iaitu jaminan bekalan makanan, kemampanan ekonomi dan pembangunan keupayaan.

“Jumlah keseluruhan nilai ekonomi bagi pelan ini ialah RM55.85 bilion,” katanya lagi.

Pakej Rangsangan Ekonomi Selangor Prihatin fasa satu berjumlah RM127.78 juta diumumkan pada 20 Mac lalu manakala fasa kedua sebanyak RM272.5 juta dibentangkan pada 1 April lalu.

© Copyright 2019 - Developed for the People of Selangor

Source: <https://selangorkini.my/2020/07/rm260-14-juta-bantu-rakyat-tangani-covid-19/>